

**Naqqiut**

Nassuiaatinut nalinginnaasunut 29. juuli 2016-imeersumut taartaasoq  
(Kalaallisut nassuiaatinut nalinginnaasunut oqaasertanik iluarsisoqarpoq)

Inatsisissatut siunnersuummut nassuiaatit

**Nassuiaatit nalinginnaasut****1. Aallaqqaasiut**

Sermip erngullu avammut nioqqutissatut atorneqarnissaat pillugu Inatsisartut inatsisaat nr. 7, 31. maj 2001-imeersoq (sermip erngullu avammut nioqqutiginnissaannut inatsit) ulloq 1. juli 2001 atuutilerpoq.

Sermimut imermullu periusissap nutaap (2016-2019) suliarineqarnerani ingerlasumi siunertaavoq, Kalaallit Nunaannut siuariartortitsinissaq, suliffissaqartitsinissaq aamma avammut niuernermit isertitaqarnissaq.

Nalaakkersuisut isumaqarput sermimut imermullu suliassaqaqarfiup ineriartortinneqarnera niuernermit tunngaveqartumik atugassaqaqartitsiviusumik pissasoq. Inuussutissarsiornermut suliassaqaqarfik Kalaallit Nunaaneersunit entreprenørinut namminersortunit imaluunniit nunanit allaneersut aningaasaliinerisigut aamma Kalaallit Nunaanni suliffeqaqarfinnut suleqateqalernerisigut, ineriartortinneqassaaq napatinneqassallunilu.

Maannakkut sermimik imermillu avammut niuerutiginninnermut inatsit atuuttoq, ingerlatseqatigiiffiit misissueqqaarnissamut aamma atuinissamut akuersissummik qinnuteqarsinnaasut tunngavigalugu atuutsinneqarpoq. Ilusilerneqarnerani siunertaavoq ingerlatseqatigiiffiit tunisassiornermik avammullu niuernermit suliqaqarnermik aallartitsinnginnermini, suliqaqarfissami misissuinermit ingerlatsinissamut periarfissinneqassasut.

Ilusiliineq taanna imminermi Kalaallit Nunaata ernganik nunarsuarmi niuerfinnut avammut niuerutiginninnermik kissaatigineqartumik iluatsitsiviunngilaq.

Sermip erngullu avammut nioqqutiginiisaanut inatsimmi taassumalu ulluinnarni atorpeqarnerani misilittakkat takutippaat, ingerlatseqatigiiffiit namminersortut inatsit taanna naapertorlugu imermik sermimillu avammut niueruteqarnissamik kissaateqartut, pisortat pilersuinnermut suliffeqarfiutaasa imeqarfiinik pioreersunik imaluunniit sumiiffinnik imermik immiinnermut imaluunniit imermik tunisassiornermit pilersinneqareersimasumit sinnerussimasumik maqitsinnermut atorsinnaanissaannut, inatsisitigut tunngavissaliinissaq naleqqutissasoq.

Taamaattumik inatsimmut allannguutissamut matumunnga siunertaavoq, suliaqartuusut namminersortut Kalaallit Nunaata ernganik nunarsuarmi niuerfinnut avammut niueruteqarnissamik kissaateqartut, pisortat pilersuinnermut suliffeqarfiinut, imeqarfiini pioreersuni imermik tunisassiornermit aalajangersimasumit sinneruttumik pisinissaq pillugu isumaqatigiissuteqarsinnaanissaannut periarfissaqarnerata erseqqissarneqarnissaa.

Inatsit manna malillugu akuersissuteqarnissamut, § 4 a malillugu isumaqatigiissummik ersarissumik, atuuttumik aamma allaganngorlugu pisussaaffiliisumik, pisortat pilersuinnermut suliffeqarfiata aamma suliaqartuusup namminersortup akornanni isumaqatigiissutigineqarsimasumik peqarnissaq piumasaqaatigineqarpoq, pilersuinnermik suliaqartup pilersuisussaataitanera tassani eqqarsaatigineqassalluni.

Suliaqartuusooq namminersortoq pisortat pilersuinnermut suliffeqarfiannut isumaqatigiissuteqarnissamik kissaateqarpat, pisortat inatsisit allat, ilanngullugu nunaqarfiit innaallagissamik imermillu pilersorneqarnerisa Namminersornerullutik Oqartussanit tiguneqarnerat pillugu Inatsisartut inatsisissaat nr. 13, 6. november 1997-imeersoq, naapertorlugit pilersuinnermik suliaqarnissamut pisussaaffii eqqarsaatigalugit tamanna pissaaq.

Pisortat pilersuinnermut suliffeqarfiat, nunaqarfiit innaallagissamik imermillu pilersorneqarnerisa Namminersornerullutik Oqartussanit tiguneqarnerat pillugu Inatsisartut inatsisissaat nr. 13, 6. november 1997-imeersoq naapertorlugu, pilersuinissamik pisussaaffeqarmat, mianerisassaq taanna suknulluunniit aammalu pinngitsuugaqarani salliutinneqartassaaq, aammalu sermip erngullu avammut niuerutigineqartarnerannut inatsit naapertorlugu akuersissut, mianerisassap taassuma illuatungeriit akornanni isumaqatigiissummi maleruagassiivigineqarsimanissaanik piumasaqaateqarfiussaaq.

Pisortat pilersuinnermut suliffeqarfiisa imeqarfiinik imaluunniit sumiiffinnik pioreersunik atuinissamut akuersissuteqarnissamut, innaallagiamik imermillu pilersuinnermut inatsit malillugu pilersuinnermik suliaqarnissamut pisussaaffeqarnermik naammassinnissinnaanissamut naammattunik isumalluutissaqassasoq, piumasaqaatigineqarpoq.

Taamaalilluni imeq tunisassiornermit aalajangersimasumit aammalu sumiiffimmit pineqartumit sinneruttoq kisimi, avammut niuerutiginnissaanut akuersissummik qinnuteqaatigineqarsinnaavoq tunniunneqarsinnaallunilu, taamaattumik tamatumunnga tunngasut illuatungeriit akornanni isumaqatigiissummi erseqqissarneqassallutik.

## 2. Siunnersuummi immikkoortut pingaarnertit

2.1. Pisortat pilersuinermit suliffeqarfianit *avammut niuerutiginninnissaq siunertaralugu imermik sinneruttumik pisinissamut inatsisini tunngavissaq ersarissaq* siunnersuummi erseqqissarneqassaaq, inatsimmi tunngaveqartumik avammut niueruteqarnissaq siunertaralugu pisortat pilersuinermit suliffeqarfianit imermik pisisoqarsinnaasoq. Taamaalilluni suliaqartuusunik namminersortunik Kalaallit Nunaata avataani nunani tuniniaanissamut imeq imerneqartussaq avammut niuerutiginninnikkut niuernermik tunngaveqartumik suliffimmik kissaateqartunik kajumissuseqalersitsinissaq periarfissaqalersitsinissarlu, inatsisip allannguuteqartinneqarnissaanut siunnersuummi matumani siunertarinearpoq.

Niuernermik tunngaveqartumik periarfissaqarfiusut taakkua inatsisissatut siunnersuummi siuarsarneqarnissaat kissaatigineqarpoq, taamaattoq nunaqarfiit innaallagissamik imermillu pilersorneqarnerisa Namminersornerullutik Oqartussanit tiguneqarnerat pillugu Inatsisartut inatsisissaat nr. 13, 6. november 1997-imeersoq naapertorlugu pisortat pilersuinermit suliffeqarfiisa innuttaasunut imermik pilersuinissamik pisussaaffeqarnerat annikillisinneqassanani.

<b>Inatsisissatut siunnersuut inatsimmut atuuttumut sanilliullugu</b>	
<i>Oqaasertalerneqarnera atuuttoq</i>	<i>Inatsisissatut siunnersuut</i>
	<b>§ 1</b> Sermip erngullu avammut nioqqutissatut atorneqarnissaat pillugu Inatsisartut inatsisaaat nr. 7, 31. maj 2001-imeersumi (sermip erngullu avammut nioqqutiginnissaannut inatsit) makku allanngortinneqarput:
	<b>§ 2</b> <b>1.</b> § 4 kingorna ilanngunneqassaaq ”§ 4 a Tamatuma saniatigut Naalakkersuisut ingerlatseqatigiiffimmut pisortat pilersuinermit ingerlatseqatigiiffiannit imermik pisinissamik

	<p>isumaqatigiissuteqartumut avammut nioqqutissatut imermik atuinissamut akuersissummik tunniussisinnaapput. Akuersissut kisermaassisussaataaffiutillugu tunniunneqarsinnaavoq.</p> <p><i>Imm.2.</i> Imm. 1 malillugu isumaqatigiissuteqarneq, pilersuisussaataaneq aammalu inatsisit atuuttut naapertorlugit pisussaaffiit allat eqqarsaatigalugit pissaaq.</p> <p><i>Imm. 3.</i> Pisortat pilersuinnermut suliffeqarfiisa imeqarfiisa ilaannit imermik pilersuinissaq pillugu pisortat pilersuinnermut ingerlatseqatigiiffiannut isumaqatigiissuteqartoqarsimappat, pisortat pilersuinnermut ingerlatseqatigiiffiat ingerlatseqatigiiffimmut namminersortumut isumaqatigiissummi nammineerluni niuernermit tunngaviusut aallaavigalugit akigititanik, annertussutsinik ilaalu ilanngullugit aalajangersaasinnaavoq.</p> <p><i>Imm. 4.</i> Pisortat pilersuinnermut suliffeqarfiata aamma qinnuteqartup akornanni atuuttumik aammalu pisussaaffiliiffiusumik isumaqatigiissuteqartoqarsimassasoq, imm. 1 malillugu atuinissamut akuersissummik tunniussinissamut piumasqaataavoq.</p>
	<p>2. §§ 5 imm. 1-imi, 7, imm. 1-imi, 13, imm. 2-imi aamma imm. 3-imi, 21-imi, § 26-imi allanngortinneqarpoq ”§ 4 malillugu” imatut ”§§ 4 aamma 4 a malillugit.</p> <p>3. §§ 12, imm. 1-imi, 13, imm. 1-imi, 14-imi, § 15-imi, 16-imi, § 20-imi, 23-imi, 24-imi, 27, imm. 1-imi aamma imm. 2-imi allanngortinneqarpoq ”§§ 3-4 malillugu” imatut “§§3, 4, aamma 4 malillugit”.</p>

	<p><b>§ 2</b></p> <p><i>Imm. 1. Inatsisartut inatsisaat ulloq 1. januar 2017 atuutilerpoq</i></p>
--	---

**3. Pisortanut aningaasaqarnikkut allaffissornikkullu sunniutaasussat**

Naalackersuisut oqartussaasui inatsit manna naapertorlugu suliaassanik suliarinninnermik suliaqartareerput, taamaattumik suliaqarnerup taassuma annertussusaa annertuumik annertusitineqassasoq naatsorsuutigineqanngilaq.

**4. Inuussutissarsiortunut aningaasaqarnikkut allaffissornikkullu sunniutaasussat**

Naliliisoqarpoq siunnersuut inuussutissarsiortunut nalinginnaasumik aningaasaqarnikkut sunniuteqassanngitsoq aammalu inuussutissarsiortunut allaffissornikkut taamaallaat killilimmik sunniuteqassasoq.

Inuussutissarsiortunut aningaasaqarnikkut allaffissornikkullu sunniutaasussat, taamaallaat suliaqartuusumut imermik sinneruttumik avammut niueruteqarnissaq pillugu isumaqatigiissuteqarnissamik kissaateqartunut tunngassuteqassapput.

Akuersissummik tunniussisarnissaq, imermik tunisassiornermit aalajangersimasumit sinneruttumik peqarnissaanik piumasaqaateqarfiussammat, piffissani pinngortitami pissusissamisoorumik pissuteqartumik imermik annikinnerusumik sinneruttoqartillugu, annertussutsit taamaaginnassasut qulakkeerneqarsinnaanngitsoq, tamanna paasineqassaaq. Taamaattumik annaasaqarsinnaaneq taanna ingerlatseqatigiiffimmit inatsit manna malillugu avammut niueruteqarnissamut akuersissummik kissaateqartumit taamaallaat nammaneqartussaavoq, aammalu aningaasaqarnikkut iluanaarutissanik annaasaqarsinnaanerup aarlerinaateqarnera taamaallaat ingerlatseqatigiiffimmit pineqartumit nammaneqartussaavoq, taamatullu ingerlatseqatigiiffik pineqartoq isumaqatigiissuteqarnermi kisimiilluni aningaasaqarnikkut iluanaaruteqartussaalluni.

**5. Avatangiisinut, pinngortitamut aamma inuit peqqissusaanut sunniutaasussat**

Siunnersuut avatangiisinut, pinngortitamut aamma inuit peqqissusaannut sunniuteqassasoq naatsorsuutigineqanngilaq.

**6. Innuttaasunut sunniutaasussat**

Innuttaasunut imermik pilersuineq salliutinneqarpoq, aammalu isumaqatigiissut sunaluunniit isumaqatigiissutigineqartoq innuttaasunut pilersuinnermit imermut sinneruttumut tunngassuteqarluni. Taamaattumik siunnersuut innuttaasunut sunniuteqassanngitsoq naatsorsuutigineqarpoq.

## **7. Sunniutaasussat annertuut allat**

Siunnersuut allanik annertuunik sunniuteqassasoq naatsorsuutigineqanngilaq.

## **8. Oqartussaasunut aamma kattuffinnut il.il. tusarniaaneq**

Siunnersuut piffissami 9. maj 2016-imiit 13. juni 2016-imut tusarniaanermut nittartakkamiitinneqarpoq.

Siunnersuut aamma oqartussanut, kattuffinnut suliffeqarfinnullu makkununnga nassiunneqarpoq:

KANUKOKA, Sulisitsisut, Nusuka, Ineqarnermut, Sanaartornermut Attaveqaqatigiinnermullu Naalakkersuisoqarfik, Aalisarnermut, Piniarnermut & Nunalerinermit Naalakkersuisoqarfik, Pinngortitamut, Avatangiisinut Nukissiuuteqarnermullu Naalakkersuisoqarfik, Nukissiorfiit, Kommuneqarfik Sermersooq, Qaasuitsup Kommunia, Qeqqatta Kommunia, Kommune Kujalleq, Pinngortitaleriffik og Ilisimatusarfik.

Makkununnga tusarniaanermut akissuteqaat tiguneqarpoq:

KANUKOKA, Sulisitsisut, Aalisarnermut, Piniarnermut Nunalerinermullu Naalakkersuisoqarfik, Pinngortitamut, Avatangiisinut Nukissiuuteqarnermullu Naalakkersuisoqarfik, Qaasuitsup Kommunia, Qeqqata Kommunia, Kommuneqarfik Sermersooq, Kommune Kujalleq.

Tulliuttuni tusarniaanermut akissuteqaatit aamma allannguutissatut siunnersuutit tusarniaanerup nalaani tiguneqartut sammeneqarput. Oqaatigineqassaaq tusarniaanermut akissuteqaatit uingasumik allassimasut, pingaaruteqassusaanik nalilersuineq tunngavigalugu pingaarnertiguinnaq issuarneqarmata.

Tusarniaanermut akissuteqaatit tamarmik tamakkiisunngorlugit Inatsisartuni ataatsimiititaliamut suliarinnittuusussamut ilanngullugit nassiunneqarput.

Kommune Kujallermit, Qaasuitsup Kommunianit kiisalu Qeqqata Kommunianit oqaaseqaatit KANUKOKA-mit nassiunneqarput, takukkit matuma kingulianiittut.

*Sulisitsisut ilaatigut allapput ”Siunertamut tamatumunnga pisortat pilersuinermit ingerlatseqatigiiffianniit pilersuinermit akigititamik aalajangersimasumik appassisumillu aalajangersaasoqartariaqannginnersoq Naalakkersuisut isumaliutersuutigisariaqaraluaaraat, taamaalilluni imermik (sermimik) avammut niuerutiginninneq, aamma namminersortunut avammut niuerutiginnittunut sinneqartooruteqartitsisinnaasoq, aallartinneqarsinnaalissalluni.”*

Akigititat annertussutsillu pillugit apeqqutit niuernermik tunngaveqartumik illuatungeriit akornanni toqqaannartumik isumaqatigiissutigineqartassasut siunnersuummi

siunnerfigineqarpoq, takuuk siunnersuummi § 4 a, imm. 3, ilaatigut naammattumik eqaassuseqartitsinissaq taamaalillunilu imermik avammut niuerutiginninnerup annertunerulernissaanut pitsaanerpaanik atugassaqartitsinissaq qulakkeerniarlugu.

*Aalisarnermut, Piniarnermut & Nunalerinermut Naalakkersuisoqarfik allappoq*  
”...allannguutissatut siunnersuummi nr. 1-imut (§ 4 a, imm. 2) nassuiaatini erngup imigassap pitsaassusia aamma imermik pilersuiviit nakkutigineqarnerat pillugit Namminersornerullutik Oqartussat nalunaarutaat nr. 7, 17. marts 2008-imeersoq iluaqutaasumik innersuussutigineqarsinnaasoq.”

Siunnersuut malinneqarpoq.

*Pinngortitamut, Avatangiisinut Nukissiuuteqarnermullu Naalakkersuisoqarfiup ilaatigut oqaatigaa* ”pilersuisussaataaernerup allallu pisussaaffiit eqqarsaatigineqarnissaat pillugu aalajangersagaq, § 4a imm. 2-imi nutaami oqaasertalerneqartoq, erseqqinnerusunnigortinneqartariaqaraluartoq tamakkiisuunerutinneqartariaqaraluartorlu ... Tassunga atatillugu § 4a malillugu akuersissummik tunniussinerup nalaani pissutsit isummerfigineqartussaapput; kisianni aamma imermik atuinerup allannguutaannut aammalu kissaataasunut nutaanut tamatuma kingorna saqqummersimasinnaasunut. (Assersuutigalugu aalisakkerinermik suliffeqarfimmik nutaamik annertoorujussuarmik imermik atuisumik sanaartornissamik kissaateqarneq saqqummersinnaavoq).”

Maleruagassat suleriaatsillu atuuttut naapertorlugit, ilanngullugu nunaqarfiit innaallagissamik imermillu pilersorneqarnerisa Namminersornerullutik Oqartussanit tiguneqarnerat pillugu Inatsisartut inatsisissaat nr. 13, 6. november 1997-imeersoq, taanna malillugu innuttaasunut sukkulluunniit aammalu pinngitsoqarani tamatigorluinnaq pilersuisussaataaneq salliutinneqartussaalluni, allannguutissatut siunnersuummi pilersuinnermut suliffeqarfiup pilersuisussaataanera sunnerneqartussaangilaq. Tamatuma saniatigut atuinissamut akuersissuterpiami kiisalu pilersuinnermut suliffeqarfiup aamma imermik avammut niuerutiginnittup akornanni isumaqatigiisummi apeqqut erseqqinnerusumik maleruagassiivigineqartussaavoq, takuuk aamma inatsimmi § 14.

Aammattaaq *Pinngortitamut, Avatangiisinut Nukissiuuteqarnermullu Naalakkersuisoqarfik* imatut allappoq: ”*Imermik pilersuiffiit nalinginnaasut ilai tatsinit imaluunniit kuunnit annertoorujussuarmik aallerfiusinnaallutik periarfissaqarfeqartunit aallertarmata, imermik avammut niuerutiginnittup imermik pilersuivimmit pineqartumit nalinginnaasumit avammut niuerutiginninnissamut imermik pisinissamut kisermaassisussaataanermik angusaqarsinnaanissaa, isumaqanngilaq. Taamaattumik aalajangersakkamik, imermik pilersuiviup taassuma, imermik avammut niuerutiginnittartunut assigiinngitsunut imermik tunisisinnaanissaanik periarfissiisumik, oqaasertaliisoqartariaqaraluarpoq.*”

Allannguutissatut siunnersuut imermik avammut niuerutiginninnissamut atuinissamut akuersissut siunnersuummi § 4 a naapertorlugu tunniunneqartoq, kisermaassisussaataaffiusumik tunniunneqassasoq, pillugu piumasaqaammik imaqanngilaq.

*Pinngortitamut, Avatangiisinut Nukissiuuteqarnermullu Naalackersuisoqarfiup aamma oqaatigaa, uunga ”pisortat pilersuineramik suliffeqarfiat” taarsiullugu oqaaseq ”imermik pilersuiviit nalinginnaasut” atorneqassasoq.*

Pinngortitamut, Avatangiisinut Nukissiuuteqarnermullu Naalackersuisoqarfimmit siunnersuutigineqartutut oqaatsinik atorneqartunik allanngortitsinissamut pisariaqartitsisoqartoq isumaqartoqanngilaq.

*Pinngortitamut, Avatangiisinut Nukissiuuteqarnermullu Naalackersuisoqarfiup aamma tikkuarpaa ”Inatsimmi § 5, imm. 3-imi § 4 a nutaaq taanna pineqartunut [ilaatinneqartariaqanngikkaluartoq]”. (Atuinissamut periarfissaqarfiusut pisinnaatitsissummik pigisaqartup pisariaqartitsineranit annertunerussasut tunngavissaritinneqarpiarpoq.)”*

Oqaaseqaatit tusaatissatut tiguneqarput aammalu siunnersuut tamanna malillugu naleqqussarneqarpoq.

*Pinngortitamut, Avatangiisinut Nukissiuuteqarnermullu Naalackersuisoqarfik ”Inatsimmi § 14-imi aamma § 4 a nutaaq taanna ilaatinneqartariaqanngikkaluarpoq, tassami § 14-imi pisinnaatitsissummik pigisaqartup kisermaassisussaataalluni inissisimanagera maleruagassiivigineqarmat.”*

§ 4 a siunnersuutigineqartoq kisermaassisussaataalluni taamatullu kisermaassisussaataani atuinissamut akuersissummik tunniussisoqarsinnaavoq, taamaattumillu inatsimmi § 14 aamma attuumassuteqartillugu atuinissamut akuersissutinut § 4 a siunnersuutigineqartoq naapertorlugu tunniunneqartunut tunngatillugu atorneqartussaavoq.

*Qaasuitsup Kommunia* sermip erngullu avammut nioqqutissatut atorneqarnissaat pillugu inatsisip allannguuteqartinneqarnissaanut oqaaseqaatissaqarsimanngilaq.

*Qeqqata Kommunia* sermip erngullu avammut nioqqutissatut atorneqarnissaat pillugu inatsisip allannguuteqartinneqarnissaanut oqaaseqaatissaqarsimanngilaq.

*Kommuneqarfik Sermersooq* aallarniutigalugu allappoq ”... Naalackersuisut inatsisip matuma allannguuteqartinneqartut aningaasaqarnikkut siuariartortitsineramik pilersitsiniarsarimmat neriulluarnartutut isigineqarpoq ...”, peqatigisaanik aarleqqutigineqartut arlallit oqaatigineqarput, ilanngullugu ”[s]inneruttunik atorneqartussaannigitsunik imermik avammut niuerutiginnittartunut tunisisarnerup, aalisarnermik inuussutissarsiuteqartunut atugassarititaasunut killissaliussat eqarnerulersinneqassasut, tassami inatsisissatut siunnersuutip atuutsinneqalernerani qanoq pisoqaraluarpuunniit, assersuutigalugu



*aalisarnermik inuussutissarsiuteqartunut imermik tunisassiornerup atorneqarsinnaasup annikinnerulersinneqartussaammat.” Aammalu ”[i]natsisissatut siunnersuutip sunniutigisaanik aalisarnermik inuussutissarsiuteqartut imermik avammut niuerutiginninnermut inuussutissarsiuteqartunut sanilliullugit pingaarnertinnginneqarsinnaasut, taamaaliornermi aalisarnermik inuussutissarsiuteqartut imminut akilersinnaassuseqarnermut, tunisassianik ineriartortitsinermit aamma suliffissaqartitsiniarnermut tunngatillugu siunnerfiit anguneqanngitsoorsinnaallutik.”*

Tassunga atatillugu oqaatigineqarsinnaavoq, siunnersuummi pisortat pilersuinermit suliaqartut pilersuisussaataanerata allanngortinneqanngimmat, aamma tusarniaanermut akissuteqaammi aamma allassimasutut, imeq sinneruttoq tassani pineqarluni. Taamaattumik inuussutissarsiutinut pioreersunut, uani aamma pineqarput aalisarnermi inuussutissarsiutinut, atugassarititaasunut killissaliussat ajornerulersinneqartussaangillat imaluunniit allatut allanngortinneqartussaanut.

*Kommune Kujalleq* ilaatigut aperivoq: ”Inuiaqatigiinni iluanaarutissat imeqarfinnik ataasiakkaanik atuisunut imaluunniit nunap karsianut tutsinneqassappat?”, kiisalu ”[a]vammut niuerutiginninnermut suliaassami pilersuiviit pioreersut allilerneqarnissaa pisariaqarpat, aammalu teknikkikkut pitsanngorsaaneermik allanik pilersitsisoqassappat (assersuutigalugu saliinnermut) periaaseq qanoq ittuussava?”

Tassunga atatillugu siullermik oqaatigineqarsinnaavoq, imermik tunisinermit sinneqartoorutit pisortat pilersuinermit ingerlatsiviannut pineqartumut tutsinneqartussaammat, tassani isertitat allatut ittut allat assigalugit isertitatut ilanngunneqartussaallutik. Tamatuma saniatigut imermik avammut niuerutiginnittartut nunap karsianut toqqaannartumik akitsuummik (royalty) akiliisussaassapput. Aammattaaq oqaatigineqarsinnaavoq siunnersuut tunisassiornermit ingerlanneqareersumit imermut sinneruttumut tunngassuteqarmat. Allatut oqaatigalugu pisortat pilersuinermit ingerlatseqatigiiffii, imermik avammut niuerutiginnittartunut isumaqatigiissuteqartoqarnerata malitsigisaanik ingerlatsinerminni imaluunniit tunisassiornermut tunngasumik annaasaqarsinnaallutik inissisimalissasut tassani pineqanngilaq.

## **Inatsisissatut siunnersuummi aalajangersakkanut ataasiakkaanut nassuiaatit**

### **§ 1-imut**

Nr. 1-imut (§ 4 a, imm. 1)

§ 4a malillugu kisermaassisussaataitanissaq anguneqarpat, inatsit manna naapertorlugu sumiiffimmut qinnuteqaatigineqartumut kisermaassisussaataitanermut piffissaliussaq, piffissamit qinnuteqartup aamma pisortat pilersuinermit suliffeqarfiata, sumiiffimmi pineqartumi pilersuinermik isumaginnittuusup, akornanni isumaqatigiissummi allassimasumit aalajangerneqassaaq.

Nr. 1-imut (§ 4 a, imm. 2)

§ 4 a, pisortat pilersuinermit suliffeqarfianut pilersinneqareersimasumut isumaqatigiissuteqarnermut tunngasunik maleruagassiiviusoq, naapertorlugu akuersissummik tunniussisoqarpat, pisortat pilersuinermit suliffeqarfiat inatsisit immikkuullarissut allat, ilanngullugu, kisiannili tassungaannaq killeqarani nunaqarfiit innaallagissamik imermillu pilersorneqarnerisa Namminersornerullutik Oqartussanit tiguneqarnerat pillugu Inatsisartut inatsisissaat nr. 13, 6. november 1997-imeersoq kiisalu erngup imigassap pitsaassusia aamma imermik pilersuiviit nakkutigineqarnerat pillugit Namminersornerullutik Oqartussat nalunaarutaat nr. 7, 17. marts 2008-imeersoq, malillugit pisussaaffiliunneqarsimasut suulluunniit malinneqarnissaasa qulakkeernissaanut pisussaaffilerneqassaaq. Pisortat pilersuinermit suliffeqarfiat taamaalilluni sukkulluunniit imermik il.il. pilersuinerup qulakkeernissaanik pisussaaffeqarpoq.

Naliliisoqarpat sumiiffimmi pineqartumi piffissami aalajangersimasumi imermik killilimmik pilersoqartoq, innuttaasunut pilersuineq sukkulluunniit qulakkeerneqassaaq. Taamaaliortoqassaaq inatsit manna naapertorlugu qinnuteqartoq taamaaliornermi annertussutsinik aalajangersimasunik qulakkeerissunneqarsinnaanngikkaluarpalluunniit.

Nr. 1-imut (§ 4 a, imm. 3)

§ 4 a naapertorlugu akuersissummik pissarsisoqarpat, suleqataasoq pineqartoq nammineerluni akigititanik, annertussutsinik kiisalu allanik niuernermit tunngasunik aalajangersaassaaq – taamaattoq pissutsini taakkunani niuernermit tunngaveqartut aallaavigalugit niuernermit pissutsit atuutsinneqassapput.

Nr. 1-imut (§ 4 a, imm. 4)

Inatsimmi matumani § 4 a naapertorlugu akuersissummut, qinnuteqartup aamma pisortat pilersuinermit suliffeqarfiata akornanni atuuttumik pisussaaffiliisumik isumaqatigiissuteqartoqarsimassasoq piumasagaataavoq. Isumaqatigiissummi matumani

aalajangersakkamik ilanngussisoqassaaq, tassani erseqqissarneqassalluni annertussutsit aalajangersimasut qulakkeerneqarsinnaanngitsut aammalu taamaallaat imeq sinneruttoq tunineqarsinnaasoq, tassami pisortat pilersuinerlut suliffeqarfiata pingaarnertut pisussaaffia tassaammat nunaqarfiit innaallagissamik imermillu pilersorneqarnerisa Namminersornerullutik Oqartussanit tiguneqarnerat pillugu Inatsisartut inatsisissaat nr. 13, 6. november 1997-imeersoq naapertorlugu innuttaasunik pilersuinissaq.

**§ 2 -mut**

Siunnersuutigineqarpoq Inatsisartut inatsisissaat 1. januar 2017 atuutilissasoq.